

QUÆSTIO MEDICO-CHIRURGICA

QUOD LIBETARIIS DISPUTATIONIBUS,
manè discutienda, in Scholis Medicorum, die Jovis decimâ-quartâ
mensis Martii, anno Domini M. DCC. XLVIII.

M. SILVESTRO - ANTONIO LE MOINE
Doctore Medico, Præside.

An Arteriotomia aliquandò instituenda,

I.



UÆ principium Arti salutiferæ dedit & incrementum, eadem sanguinis missioni præbuit originem, naturæ contemplatio. Quotiescumque enim magno molimine tentantem hæmorrhagias naturam susciperent Medici, tot ipsam symptomatibus intricatam videbant, ut operæ se pretium facturos crederent, si laboris partem sibi susciperent & bajulanti onus naturæ, detraheretur. Firmavit successus audaciam. Securius enim & jucundius ars elicit sanguinem quàm si naturæ permittatur opus, sælic quidem laudandum exitu, si nares vel uterus cedant facilius, at miserabili conditione, si vel debiliora pulmonis vasa confringens, mixtum spumis cruorem ore profuderit, vel cerebrum undequaque tabo inficiens, ipsam in arce suâ animam oppræsserit. Intereâ misso per artem sanguine, tot molestia rescinduntur symptomata, quæ vacuationem molientis naturæ, comitantur conamina. Hinc jure carpit Galenus Erasistratum, cui cùm naturæ nomen in ore semper versaretur, in eâ tamen contemplandâ adeo cæcutiebat, ut ipsam cæptis ingentibus, nunc Hæmoptysim, nunc Apoplexiam minitantem, sanguinis missionem quasi flagitare non intelligeret. Nec meliori jure Plinius nobis obtrudit magistrum in arte medendi Hippopotamum, qui sanguinis missionem eos tantum edocuit Medicos, quibus incerto volubiliq; correpta lapsu fortuna, pro ratione est atque consilio.

Porro ut in corpore humano duplex est vasorum genus, ita mittendi pariter sanguinis artificium duplex. Vel enim secantur venæ, vel sanguis ab arteriis exsilit. Venæ quidem sectio, ab ipso artis celebrata exordio, integris hodiè gaudet honoribus. An verò adhibita antiquitus fuerit arteriæ sectio, nullo satis certo firmari potest argumento, cùm pro venis arteriæ promiscuè apud Hippocratem & Aristotelem habeantur. Non tamen adeo vulgarem fuisse, satis certo concluditur ex eo quod anatomicorum sui ævi princeps Erasistratus aere, non sanguine turgere intus arterias crediderat, quæ ad usque Galeni tempora, multorum assensu, viguerat opinio. Nec tamen toto hoc tempore caruit arteriæ sectione praxis Medica, sed ipsam, nec opinî, variis instituebant methodis; talis est, alias inter, festucarum ad eliciendum sanguinem intrâ nares, memorata Plinio, immisio, renovatum à Zaccuto Lusitano Criseos tardioris impatiente artificium, nec nostris inauditum referere Hollerio.

At institutæ primùm, nec dissimulato nomîne, arteriarum sectionis gloria ad Galenum, judice Cl. Freind, referatur. Hic enim insomnio sese ferens admonitum, sibi ipsi refecuit arteriam, & præfenti accepto levamine audacior, latus hujusce artis exitus, in aliis tùm casu, tùm arte, comprobatos memoravit.

Arteriotomen ab eo acceptam non segnius laudavere Græci recentiores, imò varias hanc exequendi methodos, posteris reliquere Paulus & Aetius. Nec de illâ si luere Arabes, at ipsius laudem, amplificavit Avicennas, & à Græcis mutuata descriptionem, scripsit mandavit Halyabbas.

Interea licet per incondita scientiis & Medicinâ sæcula, ex memoriâ hominum penè deleta fuisset videatur Arteriotome, revixisse tamen cum Galeni studio, & à Medicis prius propositam, quàm Chirurgis exercitam, verisimile est. Laudat enim ipsam Hollerius, exoptantque summopere ut dentur artifices qui ipsam Galeni exemplo, audeant instituere Beccus, & Heurnius. At hujus institutæ vix quinquam ante Paræum exempla protulit, qui Galeni æmulatus audaciam, eam in seipso primum & dein in aliis feliciter exercuit.

Nec tamen sub omni cœlo Arteriotomes memoria evilerat, sed ab Arabibus acceptam, quotidiano usu comprobaverant Egyptii, & eam Medicis onustus orientis spoliis Prosper Alpinus nostras tentaverat in oras invehere.

Verùm quantumcumque sit clarissimorum virorum autoritas, hodiè antiquis ferè merfa tenebris obruitur, venæque sectioni post habita relinquitur; jurene an injuriâ? Id ex ipsâ rerum mechanicâ consideratione elucescet.

I 1.

QUANTUM differant inter se mechanicæ mutationes quæ vel sectam Arteriam, vel venæ pertusionem debent excipere satis perspectum habebimus, si & paulisper attentos detineant diversa laticis per utrumque vasorum genus erumpentis phænomena, & hujus diversitatis causas altiori scrutemur indagine.

Phænomena enim sanguinis in utroque vasorum systemate summè diversa sunt; scilicet ab arteriis coccineis floridis colore, vix concresecere docilis plurimèque remixtus lymphâ insipientibus apparet; venosum contrâ colore deformem obscuriori, faciliè coagulatum concipere, lymphâ scaterè videas pauciori; hinc Arteriosum sanguinem spiritibus & calore innato divitem sibi sinxere veteres, adeoque ipsi credere parcendum; hinc & Botallus puriorem ab Arteriis ferri, impurum verò ac morbificum per venas fluere pronuntiat. Præterea qui solutis subsumit ab arteriis exsilit cruor altè emicat & ingentem ejaculatur arcum summi impetus indicium; at quem à venis profundi videmus placidior semper effluit, nec umquam venoso sanguini contigit arteriosi prorumpentis impulsus æmulari; imò in experimentis quibus Cl. Hales vim sanguinis trifidum metiri aggreditur, qui ad septem usque pedes sese ferebat arteriosus, vix ad pedem in correspondentibus venis, assurgebat.

At undè tanta pendeat phænomenorum diversitas satis ipsa rerum mechanica consideratio patefaciet.

Arterioso enim sanguini tantum ferè virum relinquitur quantum à corde acceperat. Id ipsi solùm deficit, quòd à corde ad locum aperturæ per resistentias absumi potuit; venoso verò quantum obstaculorum per multiplicatas arte deductæ capillarium minimorum anfractus, superandum fuit; tantum etiam de viribus à corde impressis absumendum. Hinc quasi lassus ab itinere difficili per venas tardior incedit. At quot venosus sanguis superavit repagula, totidem arterioso incumbunt superanda. Illa verò, quæ vi resistunt impulsui sanguinis, ipsum repellere censenda sunt, sive ut aiunt, in ipsum reagent, renixu quidem, quem ipsi actioni penè æqualem dixeris. Hinc si vis cordis à tergo quàm minimum fatiscat, vincit vis obstaculorum adversa, sanguinemque cogit retrocedere, ut in animi deliquis pallor continuo succedens apertè demonstrat. Contrâ in venis sanguine per iter planum ad cor redeunte, reditu per valvulas fulcito, vix ulla habetur reactio; quam magnam certè tibi perperam fingeres, ubi adeò debilis est actio. Patet inde quanta arterioso sanguini obtingat in arteriis pressio, quantus ad parietes dilatandos nisi validâ vi illi renitantur, impetus; cur debilitati cedant in aneurysma ut in experimento Schreiberiano? Cur demum validiora sint Aortæ latera cum nullibi major exerceatur impetus, nullibi major reagat resistentia.

Verùm ex his quid ad comparandam arteriæ & venæ sectionis efficaciam habemus, deprehendere pronum est: non minorem scilicet inter utriusque effectus deprehendas varietatem, quàm quæ in phænomenis aderat, & eam quidem sive

in ipsâ vacuatione, sive in libertate partibus oppressis conciliandâ.

Primo quidem, quoad effectus utriusque vacuatorios, Bellini sententiâ manum dabimus. Hic scilicet efficacior pronuntiat arteriotomiam, & venæ sectionis effectuum quasi compendium. Et certè dùm tanta est sanguinis erumpentis velocitas, pari passu debet emissi copiâ adaugeri. Hinc vasa citius collabescere, hinc omnes missi sanguinis effectus celeriores animadverti, hinc rectè, ut solet, Harvæus ait arteriam etiam minimam vix per sequehoram posse subsistim sanguinem ejicere, sine animi deliquio; cùm contrâ in plures horas ejusdem nominis vena, eundem potuisset profundere prius quàm æger animo linqueretur. Præterea æqualior arteriâ sectâ humorum quantitas funditur, & majori vacuatur copiâ, suis nondùm credita vasis, moles lymphatica malorum sæpè causa.

Secundò verò effectus qui à mutata sanguinis intrâ vasa fluentis proportionem pendet, diversos deprehendes, sive in eâ canalibus parte quæ cor inter & aperturam extenditur, sive in vasis collateralibus, sive denum in eâ vasis portione, quæ rursus ab aperturâ ad dextrum cordis ventriculum, reducem vehit sanguinem.

In illâ enim quæ cor inter & aperturæ locum interjicit vasis parte, dùm nova pressio ac renitenti sanguini via panditur resistentia secundum axim, & renixus in parietes tollitur; libertas ergò in hac vasis parte increfcit, quæ in partibus proximis major, semper ab apertâ parte ad cor usque, novis aggestis resistentiis imminuitur. Hinc datur intelligere quàm parca ad arteriosos usque tractus pertingere queat, apertâ venâ libertas, cùm resistentias, columnæque sanguinæ longitudinem adaugeat in mille meandros complicata capillarium fabrica, attritus adeò per multiplicatas incrementis superficies, & angulorum, motum minuens, obliquitas. Hinc contrâ apertâ arteriâ subito deficit pulsus in trunco & sublatâ sanguinis in parietes actione nil jam nisi fremitus, observante Halefio, deprehenditur, hinc & citum, Harvæo notante, animi deliquium, quod multò tardius venis, nec nisi notabilioribus percutis fulperinduci videmus.

Collateralium vasorum eadem est ac ipsius trunci ratio. Mutuum est scilicet truncum inter & ramos resistentiæ atque libertatis commercium, facilis est ab his in illum itus & reditus. Quo igitur commercii jure, posita in vase aliquo resistentiâ refluit in proximiora vasa fluidum, ut patet ad oculum in inflammatione, eodem pariter commoda resarcitæ libertatis, prima sentiunt, quæ in viciniâ propinquo-ri sunt canalia. Dudum id demonstrare & criticæ narium hæmorrhagiæ caput, aures, oculos efficaciter sublevantes, & scarificationum hirudinumque in proximis partibus efficacia, id denum deprehendit Harvæus qui unâ carotide concisâ, pulsum alterius fatiscere deprehendebat.

Huc usque solâ distat efficacità, à phlebotomiâ, arteriæ sectio. At in eâ vasis parte quæ ab aperturâ usque ad cor pertingit, immutatur observata proportio; quòd ita contingere debere satis declarat spatii percurrendi diversitas. Venoso sanguini se facilis alveus offert, breve spatium, columna sanguinis brevis & valvulis subnixâ; hinc vix ulla sanguinis reactio, quàm etiâ ligaturâ artificialem facere necesse est si quando sanguinem uberius à venis fundi volumus. At in arteriosum quot obstacula reagent, tot si minuatur premens à tergo columna, ipsum in truncos subitâ vi repellunt, reactione victrice, sit efficax retropulsio, qualem sæpè ab arteriis, numquam à venis affectat natura, nisi cùm venosæ indolis oblitæ, capillarium rursus subeunt resistentiam; ut in atro hæmorrhoidum sanguine salubriter excreto.

At numquàm efficax arteriarum sanguinem repellentium renixus salutariùs apparebit quàm si flammeis oculis, phrenitico delirio, genis roseis, pulsu ægrotantis resultante, hæmorrhagiam prædixeris, quâ peractâ, sedatum incendium, omniaque evanuisse symptomata, nitentes oculos, collapsamque faciem, & pro rubore pallorem, mirabundus inspexeris,

CUM tantam mechanica inter utrumque præsidium demonstraret effectuum diversitatem, varios etiam ab utroque, in arte curandi successus expectandos, sola nobis ratio comprobatur. An igitur palmam in medendo venæ sectioni præcipiat aliquando arteriotome sedulius inquirenti, diversas quæ mitti sanguinem possulant recensuisse conditiones operæ pretium erit.

Triplitem verò præcipuè scopum intendimus, quoties detracti suadet sanguinem indicatio. Vel enim sanguis undequaque exuberans nimia mole partes opprimit, vel nimio correptus impetu, sui rarefactione voluminis plethoram æmulatur, vel demum in partem aliquam decumbit, ipsique hærens & affixus, eam singulari exercet Tyrannide propriisque vexat symptomatibus.

Porro si moles sanguinis exundans de ejusdem velocitate detrahat, aderit omni vasculoso generi communis plethora, quæ per varios ita sese dividet canales; ut illos magis impleat qui minorem laterum renixum obtinent, minoremque patiuntur cordis impetum. Homines ita laborare rectè dixeris, quos venis inflatos, tardè & viriùm obrutos copiâ videas incedere. His vires importunas quantocumque solvi, præcipit, Hippocrates. His ipsa venarum inflatio detrahendum è venâ sanguinem vel ipsummet edocuerit Erasistratum, frustra aggesto intrâ venas sanguine prætuleris Arteriotomen. » Venæ sectio, inquit Galenus, commune est auxilium earum quæ à plethorâ fiunt dispositionum. «

Si verò sanguinis motus intensior suos rumpi carceres postularerit, venæ sectioni quidem suus non detrahatur honos; ipsa, dum molem sanguinis imminuit, & stimulum subducit cordi & tensionem arteriis. At omnes adauctæ circulationis effectus uno ictu rescindere propositum si fuerit, venæ sectionis efficaciam evincit Arteriotome.

Etenim per Arteriotomen omne resistentiarum genus & efficacius & certius tollitur. Hinc cordis pariter in obstacula impetum imminui, & imminui simul oriundos ab illo renixu effectus, sanguinis pressio, ingens partium ejus & inter se & ad parietes attritus, æstus denique & incendium. Senferat id quancumque in caloris theoria minis perspicax Cl. Bellini dum multò notabilius arteriæ sectæ refrigerium superinduci pronuntiat; adde, quòd dum in maximo sui motûs impetu sanguis vacuatur, attritui materia prius aufertur, quàm superatis, vasorum ubi major sit attritus, capillarium angustiiis, incanduerit. In acutissimis ergò febribus Arteriotomen indicari certum demonstratumque habemus memores illius Galenici moniti, » quæ vacuatio & plurimum & celerimè vacuat ea in acutissimis morbis tentanda est. « Quòd quidem ipsi ad id altè insederat, ut nondum satis auctèr institutâ arteriæ sectione, venæ sectionem tamen eam faceret quæ proximè ad Arteriotomes accederet efficaciam. Scilicet dum misso ad animi deliquium ex instituto Hippocratico, sanguine, ob ingentem effusi cruoris copiam cordis actio fascit, vasa hærentem repellunt nativo elatere sanguinem, hinc æstum, erethismum, rarefacti sanguinis turgescientiam, excipiunt frigus, laxitas, minimorum canalium depletio. Hinc nullum aliud mittendi sanguinis finem haberi Galenus voluit, præter pulsus alterationem, vel pallorem. At si sanguis in aliquam partem decumbat, ejusque distendat vascula, difficile vel impeditum per axim ejus progressum satis arguit. Hinc quâ lege proximiora cumulo sanguine turgabant canala, eadem etiam quò propius aperturæ insidèbunt, libertatem restitutam, & promptius sentient & efficacius. Exinde porro ingens deducitur apertæ arteriæ utilitas, quâ scilicet fit illa directâ κατὰ τὴν antiquorum hydraulices legibus, ratione naturali, observatione, & demum naturæ agentis contemplatione comprobata ac demonstrata; quâ nulla, teste Cl. Freind, aut certior aut efficacior. Sed si ab infarciens vasa materiâ malum pendear, non id solum est aut maximum arteriæ sectionis commodum; sed, ut aufertur qui obstructum à tergo moleculam in angustiora cogebat, cordis impetus, sic novo vasorum nixu repellitur illa, sitque hærentis moleculæ non illi ab similibus retropulsio quam vidit olim in vespertilionis alâ Lewen-

hoecclius cum redeunte vasorum tono in liberiora spatia repellerentur concretæ ad minora vasa sanguinis moleculæ. Et hanc quidem retropulsionem aliquatenus æmulari sectâ venâ dabitur si, misso ad animi deliquium sanguine, vasorum minimorum elatere, instituto Boerhaaviano, frictione per totum venæ sectionis tempus, ad actionem sollicitaveris.

Principiis hisce firmata ac stabilita Arteriotome jam certè jactatissima inter Medicinæ præsidia sibi locum vindicabit; etenim ipsam & utili venæ sectione utiliozem, & ipsâ sæpè vix utili quin imò quandoque perniciosâ utilem atque salutiferam deprehendes.

Etenim venæ sectione ipsam utiliozem quotiescumque sanguinis intensior est circuitus, vel pars oppressa gemit sanguinis pondere, cum & vacuet potentiùs, & revellat efficacius, abundè demonstratum confidimus. Sed dantur etiam mala quibus se vix utilem præbet venæ sectio, & suum servat adhuc usum arteriæ sectio. Ecquid enim à venæ sectione speraveris si sedeat in ultimis tenuissimorum vasorum angustis jus civitatis quasi adepta obstructio? Nulla inde apertis venis nisi summo virum dispendio vacuatio, nulla sperari potest retropulsio, dum proximâ tenuique apertâ arteriâ utraque sequeretur in parte nec mutato reliquo corpore. Hinc ipsas conjunctivæ arteriolas pungere sæpè salutis fuit. Hinc & in pertinacioribus ophthalmiis crudelior antiquissimorum praxis fuit, longis incisionibus partes incidere vicinas, institutâ sic à nec opinis arteriæ sectione. Sed si extrâ communem venis arteriisque rubris circuitum, in vase lymphatico hæreat obstructio, ut in calido Boerhaaviano œdemate, mali causam non attinget venæ sectio utut levandis sæpè idonea symptomatibus. Hinc lymphæ tot adhibent revulsoria quorum effectus æmulatur arteriæ sectio: simul enim cum sanguine profilit uberior lymphæ minorique copiâ ad sua diverforia appellens, partes obstructas minùs opprimit; unde illis reagendi potestas redibit, ut aliis lymphæ revellentibus adhibitis contingere solet. Sed inde magis gloriatur Arteriotome quòd noxiâ etiam venæ sectione, non semper repudianda sit. Aliquandò scilicet per summam morbi violentiam, itâ arctantur erethismo solida, liquida verò itâ inflammatoriâ densitate compinguntur, ut per minimos arteriarum tractus sanguini transitus denegetur, pars tantùm subtilissima per collapsas delata venas vitæ reliquias alit, quam si sectâ venâ detraxeris, quod vitæ supererat simul auferetur. Contrâ verò, si quòd crassius est & densius per Arteriotomen eduxeris, toti sanguinæ compagi laxitas induci, distractis sua reddi vasis actio, hinc novus vitæ vigor afflari, & è desperationis medio spes sanationis proxima, affulgere.

I V.

QUANTUMCUNQUE firma per se ratio nullis indigeat adminiculis, gaudet tamen hominum assensu, & inde validior solet incedere. Ut ergò arteriæ sectionis laudes quasi fanciat authoritas, vix ulla datur ejus instituendæ indicatio, quam non aliquandò portentoso successu adimpleverit, æquè in acutissimorum malorum vehementiâ, atque chronicorum pertinaciâ celebrata. In acutis enim dum symptomata ingentia, dolorque pulsatilis & ingentem vasorum distractionem, & vires arteriarum repellentes integras indicat, maturè adhibita arteriæ sectio, & dolorem, & doloris causam simul abripit, & placidâ quiete componit omnia. Hinc iis primùm suavit arteriæ sectionem Galenus affectibus, qui à tenui, spirituosio, calidoque sanguine, ducerent exordium; talem enim vehi per arterias crediderat. Inter illos porrò primariam recenset, quæ latera costarum elatiori præsertim sede obfidet, & vehementi morfu fodicat pleuritidem, quam etiam instantaneâ efficacità per institutam arteriæ sectionem evanuisse memorat. At causarum analogia, facilis alterius in alteram ex Hippocratis & Sydenhami observatione, mutatio; imò & Recentiorum observata nonnulla docere videntur, quantum præsidii à sectâ arteriâ sperandum sit in horrendo & symptomatibus immanibus effero malo phrenitide, quam ideo in eâ secari summopere

suadet Ballonius. Nec minori ratione summos ab illâ spondet successus nuperimus auctor cl. Nihell, in illis præsertim hujusce mali speciebus, in quibus pulsare deprehenduntur Carotides, & eò quidem rectius quòd in illâ phrenitidis specie sanguinis in Carotidum parietes impetus, summam per minutissima capillaria transituro resistentiam demonstrat, & medellam efflagitet quàm præsentissimam. Inani certè metu arteriæ sectionem in phrenitide repudiabat Antiquitas, cum nulla alia methodus in curandâ phrenitide, magis sit naturæ familiaris, quàm sanguinis è naribus eruptio, imò vix ullam à naribus meditetur hæmorrhagiam, qui non phrenitica aliqua illuxerint symptomata.

At aliud acutorum genus non tam sæpè causis, quàm symptomatibus adversum, quo simul & infarciuntur vasa & vis eorum contractilis ac repellens opprimitur Apoplexia, dum simul & hærenti sanguini effugium parabatur, & vas tonus resarciebatur, vasa certiùs arteriæ sectioni cedere; cujus non semel experitus efficaciam memoriam Anglus Cathervood posteritati consecravit.

In chronicis verò affectibus, ut ut non adeò latum obtineat imperium arteriæ sectio, revellendis tamen obstructionibus mirè prædicata fuit, modò non còncurrat vasorum laxitas, sed intus hærentis moleculæ actio distrahât adhuc parietes, doloremque conciliet.

Hùc porrò non una morborum species pertinet; sed alia vivaci dolore importuna perpetuò fatigat, alia verò patitur inducias & ad externarum causarum insultus recrudescens nunc sævit crudeliùs, nunc verò sopita conquiescit.

Ad priorem speciem singulariùs referuntur tot chronicarum & rebellium inflammationum genera, quæ sive à partis affectæ conditione, sive à obstruentis materiæ caractere, sive à vasorum genere rebelles communibus medicinæ auxiliis obsecundare recusant. Tales sæpè ars ingemuit ophthalmias in quibus minutissima vasa sanguine gravata, vix per venæ sectionem exhaursit, aut materiam infarcièntem repellere queunt. Pessimi tamen generis in aere Ægypti fervido, quàm facili sectioni arteriæ cedant, unus testetur Prosper Alpinus, qui ipsas hoc artificio præstigiū more, ut ait, sanatas mirabatur. At longo protracta tempore, & jus domini, quasi adepta cephalæarum incommoda, non majori operâ eodem admirante curabantur; sed apud nos etiam pertusis multoties venis, nec remittentem tamen capitis sine febre dolorem subito successu sustulit Yvoni Chirurgo institutâ arteriæ sectione Ballonius, Decennales pariter elusis omnibus remediis, tandem victrix Arteriotomia edomabat, restante Aurelio Severino, quàm quidem efficaciam arteriæ sectioni peculiarem ne pronunciemus parùm morabitur Botalli autoritas, qui ne decennale quidem vidisse se refert cephalæam quæ venæ sectioni cedere recusavit. Hùc & varia referuntur exempla, à Galeno de Arteriotomes successu prolata, & diuturni dolores hepatis, quos ipsi sibi sectâ, quæ pollicem inter & digitos excurrit arteriâ persanavit, & gravissimus ad ischia decumbens cruciatus quem in alio sanatum memorat, innumeraque alia quæ passim in Authorum monumentis consecrantur.

At illis qui nunc quidem cessant, nunc verò recrudescunt dolorum generibus comprobata pariter est efficaciam arteriæ sectio. Hæc ipsi propria quasi laus est, ut hæmcraniarum genus pessimum, dolore vix tolerandum, pertinaciâ verò acerbiorè, itâ funditus auferat, ut & ipsa mali dispereat memoria. Hinc non apud Ægyptios solùm in hunc finem adhibita legitur, sed & ab hujus mali curatione apud nos, primam sibi famam conciliavit, dum Gesnero Paræoque pertinacem simul cum acerbo symptomate causam aufererat, non minoris in aliis multis hominibus efficaciam, & alios inter in clarissimo Principe Rupefuriensi, ut gratus testatur Paræus. Hinc forsàn erit ut quondam non minori ipsam laude prosequamur, in pertinacissimis ischiadicis rheumaticisque doloribus quos jam hujus ope sanatos fides sit penès Antyllum apud Oribazium, forsàn & devix ingens afferet arthritidis solatium, cum præsertim illis in malis insideat lymphatico vasi causa sympto-

matum. Ex his porrò quid valeat arteriæ sectio satis patet, nec longius immorabimur in recensendis tot malorum speciebus, quæ ad easdem classes referuntur, vertigine scilicet, epiphorâ, hæmorrhoidum doloribus, quorum ab Arteriotome sanatorum amplissimis firmata testimoniis exempla congestit cl. M. Aurelius Severinus de efficaci Medicinâ, lib. 2.

At quæ circâ Maniam Epilepsiamque humanis ferè auxiliis impervia mala idem author felicia instituta Arteriotomes experimenta tentaverit, adeò levi pede prætermittere non finit rei dignitas, & instituti ratio.

Maniam enim arteriæ sectione non semel & coram aptis iudicibus instantaneâ perfanavit efficacîâ, methodo quidem nec Græcis nec Arabibus ignorâ, sed quam desuetudo ex hominum memoriâ aboleverat.

Epilepsiæ verò, cujus unam saltem speciem hæc methodo referente Alpino tollunt Ægyptii, ita per Arteriotomen consuluit, ut ægris quidem omnibus solamen adnirandum attulerit, uni verò etiam integram curationem. Sed ut tantis authoritatibus cumulum addat naturæ autoritas, nonnè notum illud est quas illa meditabatur ab arteriis hæmorrhagias vel venæ sectione non præpediri, ut de hæmorrhagiâ anginam judicante refert Swietenius, vel magno ægri malo præpediri? Quid plura? Cum demùm Vir summæ autoritatis Pr. Alpinus nunquam sine successu sectam viderit arteriam, ut jure meritòque videatur nuperrimus author cl. Nihell de arteriæ sectione pronuntiare, plus ab illâ quàm ab alio quovis remedio honoris, atque laudis, in Medicinam redundasse.

V.

FRUSTRA tantis superbiat effectibus arteriæ sectio, si dùm præsentî ægros eripit periculo, malis mergit altioribus. Desuetam multi indè aiunt Arteriotomen, quòd tutò non potuerit institui. Reverà quidem vicinior cordis impetus, obnitentiumque resistentiarum renixus, majorem sanguinis in parietes actionem efficiunt; undè duplex malorum labes exurgit. Nascitur hinc scilicet compesci indocilis hæmorrhagia quæ vitam cum sanguine profundat, nisi superveniat ars efficacior; aut si tandem cicatrix inducta fuerit, cedit illa sanguini impellenti debilior, sensuque in saccum expanditur, aneurysma dicunt.

Verùm majores arterias nescis sit attingere; minores tantùm suademus percutendas. In iis porrò cordis impetus deservescit, hinc imminuitur hæmorrhagiæ, minuitur aneurysmatis periculum, quas minori sanandas operâ indè deduxeris, quòd notabiliores etiàm legitimâ compressione, debitæque vacuatione prægressâ, omnino, infcio etiàm ægotante, ad integram perductæ fuerint sanationem.

Præterea non una est ratio quâ possit via sanguini per apertas concedi arterias. Vel enim more venarum summâ punguntur lanceolâ, vel transversim resectæ, pleno sanguinem fundunt alveo. Si porrò punguntur arteriæ, difficillè distrahuntur hinc indè fibræ, tum quæ in longitudinem porriguntur, tum quæ diametrum circulariter ambiunt, & in omnem sensum ad sua contractæ principia, aperturam ampliant. Hinc via sanguini liberior panditur, hinc inducendæ cicatrici, mora crescit & difficultas. Non ergò fluendi prius sanguis finem faciet, quàm vel desuerint vires, vel ars compressione sanguinis impetum represserit. Sic per temporalem arteriam ad sex usque libras sanguinem Paræus eduxit. Crescente ergò in hæc methodo, post inflictum vulnus aperturâ, crescit periculum, requiritur operosum fasciationis artificium quo inter fixa duo puncta prematur, & quasi obliteretur arteriæ cavitas. Nec tamen intactam adhuc ab objectionibus vindicabis operationem, licet & non aliâ usus methodo Paræus omnia tuta timentium trepidationem posthabuerit, & se plusquàm duodecies arteriam temporalem tutò pertrudisse referat Meerkrenius.

At si totam transversim in parte molli secueris audacior arteriam, constringentur sublata in axim resistentiâ, victrice vi elasticâ circulares ejus fibræ, diamet-
ter ejus arcuabitur, undè brevè deservescet sanguinis exeuntis impetus, At longi-

tudinales interea fibræ, nihilò feciùs hinc & inde discissæ retrahuntur & sub vicinis partibus delitescunt. Ibi verò ambientium elatere partium, propriâ contractione, minorumque parietes constituentium vasorum ob imminutas intus resistentias ampliatione, occluduntur utraque discissæ arteriæ extrema, spontè cessat hæmorrhagia nullo excipienda periculo.

Hæc vera est & legitima arteriarum aperiendarum methodus, quam nulla elavare queat objectio, nullus timor labefactare; nec aliam voluit Galenus institui, sed pertusarum arteriarum incommoda objicientibus, transversim secandas indicabat arterias. Hanc omnes experti præferent Chirurgi, & nedùm nimia profluentis copiâ sanguinis, noxæ prævertendæ tibi se objiciant, quam parca sæpè possit educi ejusdem quantitas miraberis. Nec spem sibi inde tantam pollicerentur, qui non satis attendunt, minùs interesse quanta sit sanguinis effusi copiâ, quàm qualis & undè exiverit. Adde quòd nullis sit vexandus æger fasciis quæ in partem quam secari volumus arteriâ liberam, resistentias tantùm adaugeant, solis glutinantibus sanari faciliè vulnus relinquitur.

Nec adeò damnosa naturæ censenda est rami unius arteriosi jactura. Novos sibi calles solers eudere, vicinos sensim ampliabit ramos, ut ne ullum quidem deperditum remaneat vestigium. Quam sese reparandi efficaciam frustrâ malè incredulus naturæ negaveris, cùm reparentur in magnis ulceribus, solâ vasorum dilatatione tot arteriarum millia; cùm demùm exemplo non adedinsolito, ligatâ cubitali arteriâ mirum in modum radialem expandi deprehendant Chirurgi: nihil ergò à secandis arteriis deterreat, in parte quidem molli, sæpè enim in ossium cavis delitescentes arteriolæ lethale sanguinis effecerunt effluvium, dùm nec ab ambientium elatere comprimi, nec ossis duri parietibus appressæ in suam possent contrahi diametrum. His ergò freti observationibus ad incidendas arterias tutò accingemur, cujus quidem operationis, non minorem demonstrasse utilitatem, quàm securitatem arguisse, confidimus.

Ergò Arteriosomia aliquandò instituenda,

DOMINI DOCTORES DISPUTATURI.

M. Julianus Bussion.

*M. Petrus Eversher, Scholarum
Professor,*

M. Theodorus Baron.

*M. Andreas Cantwel, Regiæ
Societatis Londinensis Socius,*

M. Ludovic. Hieronymus Cosnier.

*M. Ludovicus-Joannes leThieul-
lier, Regis Consultarius in Ma-
jori Consilio & in magnâ Re-
giæ Domûs & Franciæ Præse-
cturâ Medicus ordinarius,
necnon Imperialis Naturæ Cu-
risorum Academiæ Socius,*

M. Urbanus de Vandenesse.

*M. Benjamin-Ludovicus Lucas
de Lawrembert.*

*M. Nicolaus le Roy de Saint Ai-
gnan.*

Proponerebat Parisiis ANNA-CAROLUS LORRY, Parisiensis, Saluber-
rimæ Facultatis Medicinæ Parisiensis Baccalaureus,
A. R. S. H. 1748, à sextâ ad meridiem.